

JARDUERA



Ikastetxearen Hizkuntza Planteamendua¹

11

HELBURUAK

- **Ikastetxearen Hizkuntza Planteamendua adostea eta zehaztea.**

prozedura

Hauxe da Ikastetxearen Hizkuntza Planteamendua: ikastetxearen jardunbidea gidatzen duten irizpideen eta erabakien multzoa, hizkuntzen irakaskuntzari eta haien erabilerari lotua.

Planteamendu honek eguneroko jarduneko erabaki zehatzak hartzen laguntzen du. Horrez gain, erabilgarria da bertan jasotzen diren irizpideak eta jardunbideak familiei, irakasleei edo hezkuntza-komunitatera etorri berriak diren irakasleei zein irakasle ez diren langileei jakinarazteko.

Abiapuntu gisa, Hizkuntza Proiektuaren batzordeak ikastetxeak indarrean dituen irizpideak eta iritziak berrikusiko ditu. Horretarako, lagungarri izango zaizkio diagnostiko faseko 6, 7, eta 8. jarduerak (ibilbidea eta indarrean ditugun praktikak aztertzea). Analisi hori osatzeko komeni da hizkuntzen irakaskuntza eta haien erabilerari buruz ikastetxeak urteetan zehar hartu dituen erabakiak biltzen dituzten dokumentuak aztertzea (Hezkuntza Proiektua, Curriculum Proiektua, Hizkuntza Normalkuntza Proiektuak, Hezkidetzak, Kultura-artekotasuna, Elkarbizitza, AJA...)

Jarduera honetan proposatzen den tresna alde batetik, eta gida honetako material osagarriak, bestetik, baliagarriak dira datuen jasoketa egiteko, azaleratu behar diren alderdiak eta erabaki behar direnak zehazteko eta haien inguruko gogoeta, eztabaida eta erabakiak hartzeko prozesua bideratzeko.

Aztertutako materialaren arabera, Hizkuntza Proiektuaren batzordeak Hizkuntza Planteamenduaren lehenengo zirriborroa idatziko du. Ondoren, ohiko bideak erabiliko ditu hura zabaltzeko eta irakasle-taldeari helarazteko, haiek onetsi edo alda dezaten. Onetsitakoan, hezkuntza-komunitateari helaraziko zaio.

emaitza | ekoizpena

denbora | denbormalizazioa

Hizkuntza Proiektuaren *Ikastetxearen Hizkuntza Planteamendua* atala idaztea.

Aste bat edo bi, abiapuntu gisa hartuko diren dokumentuak aztertzeko eta batzordeak proposamenak idazteko.

Horrez gain, bi lan-saio beharko dira irakasle-taldeak proposamenen inguruan gogoeta egin, haiek hobetu eta planteamendua adosteko.

tresnak

ereduak | adibideak

11.1. tresna. Ikastetxearen Hizkuntza Planteamenduaren datuak jasotzeko taula | 95. or.

11.1. adibidea. Ikastetxearen Hizkuntza Planteamendua | 131-132-133-134. or.

¹ Ikastetxeek hartuta dituzte erabaki asko hizkuntzen erabilerari eta haien irakaskuntzari buruz eta garatuta dituzte haien inguruko irizpideak eta ohiturak euren ibilbidean zehar. Horietako asko esplizituki adostu dira, beste batzuk, berriz, modu inplizituan txertatu dira. Ikastetxearen Hizkuntza Proiektua aukera ona da planteamendu horiek berrikusteko, oraindik baliagarriak direnak berresteko eta indarra galdu dutenak berriro zehazteko. Orobat, modu inplizituan funtzionatzen zuten haiek agerian jarriko dira eta zehaztu gabe zeudenak eta beharrezkotzat jotzen direnak adostuko dira.